



ЕЛБАСЫ ЖӘНЕ ЕЛОРДА

4-БЕТ | ТӘУЕЛСІЗДІК



ҚОСЫМША ҚАРЖЫ ҚАЙ САЛАҒА БӨЛІНЕДІ?

5-БЕТ | ҚАЛА МЕН САЛА



КҮШ АТАСЫ КІМНЕН ЖЕҢІЛДІ? НЕГЕ?

8-БЕТ | АҚТАҢДАҚТАР АҚИҚАТЫ

“”

Нұрсұлтан НАЗАРБАЕВ,  
ТҰҒЫШ ПРЕЗИДЕНТ – ЕЛБАСЫ:

ТӘУЕЛСІЗДІКТИҢ НЕГІЗГІ МӘНІ ТАРИХТЫҢ ЖАҢА БЕТІН ӨЗ ЕРКІҢМЕН, ШЕШІМІМЕН БАСТАУДА БОЛСА КЕРЕК. ТӘУЕЛСІЗДІК БІЗГЕ ЖАҢА ЖОЛЫМЫЗДЫ, ӨЗІМІЗДІҢ СОНЫ СОҚПАҒЫМЫЗДЫ ТАБУҒА ЗОР МҮМКІНДІК ЖАСАДЫ. СОЛ ЖАҢА ЖОЛЫМЫЗДЫ БІЗ АСТАНА АРҚЫЛЫ ТАПТЫҚ. АСТАНА ХАЛҚЫМЫЗДЫҢ АЯЛЫ АЛАҚАНЫ, ЫСТЫҚ МЕЙІРІМІМЕН ТҰРҒЫЗЫЛДЫ. СОНДЫҚТАН ДА БҰЛ ҚАЛА БӘРІМІЗГЕ ЕРЕКШЕ ҚЫМБАТ, АЙРЫҚША АЯУЛЫ.

ҚАЗАҚСТАН  
ТӘУЕЛСІЗДІГІНЕ  
30 ЖЫЛ

№61 (4185) Бейсенбі 27 мамыр 2021 жыл

ELORDA АППАРАТ

# ASTANA

РЕСПУБЛИКАЛЫҚ ҚОҒАМДЫҚ-САЯСИ ГАЗЕТ А Қ Ш А М Ы 1990 ЖЫЛҒЫ 13 ҚАЗАННАН БАСТАП ШЫҒАДЫ



## 403 ТҮЛЕК «АЛТЫН БЕЛГІГЕ» ҮМІТКЕР

Тағы бір оқу жылы аяқталды. 25 мамырда елордалық мектептерде дәстүрлі соңғы қоңырау өтті. Биыл 1-10-сынып оқушылары үшін іс-шара онлайн форматта, ал мектеп бітіруші түлектер үшін білім мекемелерінің аулаларында өткізілді. Нұр-Сұлтанда 130 мектеп бар, онда 193572 оқушы білім алады. Биыл 7471 елордалық түлек мектеп бітіреді. Олардың ішінде 403 оқу озаты «Алтын белгіге» үміткер. Елорда әкімі Алтай Көлгінов мектеп бітіруші түлектерді мерекемен құттықтады.

3-БЕТ

## ЖҮЗ ҮЗДІК ҚАТАРЫНДА

Елордалық 10 мектеп «2020-2021 оқу жылының республикалық олимпиадасының қорытындысы бойынша Қазақстанның 100 үздік олимпиадалық мектебі» тізіміне енді.

Оқу жылының қорытындысы бойынша 110 астаналық оқушы республикалық олимпиаданың қорытынды кезеңіне өтіп, 68 жүлделі орынға ие болды, оның ішінде 11 алтын, 24 күміс және 33 қола медаль. Соның ішінде 3 елордалық білім беру мекемесі – дарынды жасөспірімдерге арналған білім-инновация лицейі, Nurgoda мектеп-лицейі және №46 мектеп гимназиясы «Үздік олимпиадалық мектеп» атағына ие болды.



## СУҒА ШОМЫЛҒАНДА САҚТЫҚ ҚАЖЕТ

Елордада күн күйіп тұр. Сынап бағанасы 30 градустан асып түсті. Мұндай ыстықта жанға сая беретіні – суға шомылу. Осы орайда биыл Нұр-Сұлтан қаласы аумағында 20-дан аса суға шомылу орындарын ашу қарастырылып жатыр. Ал әзірге қалалық саябақтың жағажайында, «Астаналық аула» және «Три пескаря» орындарында шомылуға рұқсат берілген. Қалған орындарға мемлекеттік мекемелер тексеру жүргізіп жатыр. Төтенше жағдайлар департаменті суға шомылу маусымының қашан ашылатынын жақын күндері жариялайды.

6

## ТҰЛҒАЛАР АТЫ ҰСЫНЫЛДЫ

Нұр-Сұлтан қаласы ономастика комиссиясының отырысында елордадағы екі мектеп пен мәдени ошаққа тұлғалар атын беру ұсынысы мақұлданды. Қалалық Қоғамдық кеңес отырысында аталмыш ұсыныстармен Тілдерді дамыту және архив ісі басқармасы басшысының орынбасары Сәкен Есіркеп таныстырды.

Атап айтқанда, №54 мектеп-лицейге белгілі ғалым, филология ғылымдарының докторы, профессор Акселеу Сейдімбектің, №86 мектеп-гимназияға ұлы жазушы, академик Мұхтар Әуезовтің, Мемлекеттік академиялық филармонияға көрнекті композитор, КСРО халық әртісі, ҚазақКСР Мем-


лекеттік сыйлығының лауреаты, Қазақстанның Еңбек Ері, профессор Еркеғали Рахмадиевтің есімін беру ұсынылды. Қоғамдық кеңес мүшелері бұл ұсыныстарды қолдады. Енді аталмыш ұсыныс жақын күндері қалалық мәслихатта қаралады.



## «АЛЖИР»-де ТУҒАН АРУ

«Анасы ұрлық жасады» деген жалған айыппен сотталып, «АЛЖИР»-де жазасын өтеп жүргенде дүние есігін ашқан қыздың тағдыры қалай өрбіді?

8-БЕТ



## ЕКПЕ АЛСАҢЫЗ, ЕСІК АШЫҚ!

Елордада тұрғындарды вакцинациямен кеңінен қамту үшін 100 екпе жасау орны жұмыс істейді. Бүгінде қаладағы «Mega Silk Way», «Keruen», «Хан Шатыр», «Абу-Дабі Плаза», «Азия Парк», «Сарыарқа» сауда, ойын-сауық кешендерінде, «Астаналық», «Әлем» сауда үйлерінде жалпы халыққа арналған екпе орындары іске қосылған. Вакцинация пункттерінің кеңеюіне байланысты медицина ұйымдарының жұмыс уақыты қысқарып, 08:00-22:00 аралығына белгіленсе, сауда, ойын-сауық кешендерінде сағат 10:00-ден 22:00-ге дейін екпе алуға болады.

























## КИЕЛІ НЫСАНДАР ҚАТАРЫНА ҚОСЫЛМАҚ

Нұр-Сұлтан қаласы қоғамдық кеңес отырысында қалалық Мәдениет басқармасының басшысы Нұрлан Әлімжан «Әзірет Сұлтан» және «Нұр Астана» мешіттерін киелі нысандар қатарына және XIX ғасырда салынған бұрынғы мұсылман мектебінің екінші ғимаратын қала құрылысы және сәулет ескерткіші санатына қосуды ұсынды.

amangali.kalzhana@mail.ru

Аманғали ҚАЛЖАНОВ

«Әзірет сұлтан» және «Нұр Астана» мешіттері қаладағы бірегей нысандар болып саналады. Бұл мешіттерге Меккеден қасиетті бұйымдар әкелінді. Осы заттар аталмыш мешіттердің киелілігін айқындайды. Әрине, қалада ескі мешіттер бар. Бірақ олар «Әзірет

Сұлтан» мен «Нұр Астанамен» салыстыруға келмейді. Тиісті сараптама «Бозоқ» республикалық мемлекеттік кәсіпорны жасады. Бұл құжат Мәдениет және спорт министрлігінде тіркелді. Ал мұсылман мектебінің бірінші ғимараты республиканың «Киелі нысандар» картасына енгізілген. Ал екінші ғимаратты қала ескерткіші қатарына қосу ұсынылды, – деді қоғамдық кеңес мүшесі Мейрамбай Оралов. Кеңес мүшелері бұл ұсынысты мақұлдады.

## ТӨЛ АСПАПТАР ҮНІ ЖАҢҒЫРДЫ

Нұр-Сұлтан қаласы әкімдігінің мемлекеттік академиялық филармониясына қарасты «Сарыарқа» фольклорлық ансамблінің XXIII концерттік маусымы жабылды. Ансамбльдің көркемдік жетекшісі, композитор, Мәдениет саласының үздігі Тоғжан Жахин фольклорлық аспаптарға арналған авторлық жобасын көрермендерге ұсынды.



Рухани кеште қазіргі уақытта көп қолданыла бермейтін көне аспаптардың үні жаңғырып, автордың шығармаларымен қатар, ұлттық өнерді ұлықтап жүрген қазіргі заман композиторларының шығармалары орындалды.

Кезінде Болат Сарыбаев талай ұлттық аспаптарды жаңғыртты. Концерт мақсаты өнер кеңістігінде төл

аспаптардың алар орнын айқындау болды. Сол аспаптардың сарыны, үні ұмытылмас үшін «Сарыарқа» ансамблі үшін арнайы туындылар жазылып, репертуар қорын көбейтті.

Сондай аспаптардың қатарында үлдек, тастауық, құссайрауық, шыңырау, үскірік аталады. Композитор оларды жақынырақ таныстырды.

## САХНАДА – ҚАЙТАЛАНБАС «КАРМЕН»

«Астана Опера» театрында Ж.Бизенің «Кармен» спектаклі қойылады.

29 және 30 мамырда «Астана Опера» театрының жетекші солисі, Қазақстанның еңбек сіңірген қайраткері Мейір Байнеш алғаш рет Ж.Бизенің «Кармен» операсындағы Дон Хозенің партиясында Үлкен зал сахнасына шығады. Екінші күні опера труппасының солисі, Қазақстанның еңбек сіңірген қайраткері Жамиля Жарқимбаева Микаэляның бейнесінде дебют жасайды. 29 мамырда Қазақстанның еңбек сіңірген қайраткері Айгүл Ниязова Микаэла рөлінің өзіндік интерпретациясын ұсынады. Қызуқанды әрі еркіндікке жаны құмар сыған қызы Карменнің бас партиясын Қазақстанның еңбек сіңірген қайраткері Дина Хамзина мен Татьяна Вишинская орындайды. Торедор Эскамильоның бейнесін Қазақстанның еңбек сіңірген қайраткері Талғат Мұсабаев пен жақында ғана «Астана Опера» театрының опера труппасын толықтырған тағылымгер солист Расул Жармағамбетов сомдайды.

Операдағы оқиға XIX ғасырдың бірінші жартысындағы Испанияда өрбиді. Оқиғаның қақ ортасында – темекі фабрикасының өзге жұмыскерлерінен ерекше көзге түсетін сұлу сұлқым, құштарлыққа толы әрі азатшыл сыған қызы Кармен. Бастапқы шығармадан өзгешелік ретінде Бизе кейіпкерінің мінезін игілендіріп, сезімнің бірбеткейлігі мен іс-қимыл еркіндігіне баса назар аударған. Либретто авторлары опера әрекетіне бейнелі халық сахналарын енгізген. Кармен – еркіндігі әрі махаббатының күші сүйген жаны мен өзі үшін талқандаушы күшке ие болып, пешенесіне жазылғанға көнген әйел.

Спектакльдердің басталуы: 29 мамыр, сағат 18.00-де, 30 мамыр, сағат 17.00-де.



## БЕЙБІТШІЛІК ПЕН КЕЛІСІМ ЖОЛЫ

Тәуелсіздіктің 30 жылдығына орай, Конфессияаралық және өркениетаралық диалогты дамыту жөніндегі Н.Назарбаев орталығы алаңында әлемдегі жетекші дін – христиан дініне арналған «Бейбітшілік пен келісім жолы» халықаралық фотокөрмесінің салтанатты ашылу рәсімі өтті.



Әлемдік және дәстүрлі діндерге арналған тақырыптық фотокөрмелер сериясындағы екінші фотокөрме жалпы адамзатқа ортақ рухани құндылықтарды дәріптеуге, әлемдегі түрлі халық діндері мен мәдениеттеріне деген толеранттылық көзқарасты қалыптастыруға бағытталған.

Көрмені 25 маусымға дейін Бейбітшілік және келісім сарайына барып тамашалай аласыздар.

Жәnel ҚҰТТЫБАЙ,  
Л.Н.Гумилев атындағы Еуразия  
ұлттық университетінің студенті

Ағылшын жазушысы Луис Пул қазақ халқының ежелгі мәдениеті мен дәстүрі туралы сыр шертетін «Жарық жұлдыз» атты балалар кітабын жазды.

## АҒЫЛШЫН ЖАЗУШЫСЫНЫҢ «ЖАРЫҚ ЖҰЛДЫЗЫ»

Луис ежелгі адамдардың алғаш рет жылқыны қолға үйреткен Ботай мәдениеті жайлы ақпарат жинап, зерттей бастайды. Зерттеу барысында автор Қазақстанның мәдениеті, табиғаты жайлы мол мәлімет алған. Кітаптың басты кейіпкері – 12 жастағы Раушан есімді қыз бен Жарық жұлдыз атты жылқы. Оқиға желісіне сәйкес Раушан жануардың тілін тауып достасады. Шығарманың оқырманы – 7 мен 11 жас аралығындағы балалар. Бірақ ересек адамдар да одан өзіне керегін таба алады. Бүгінде көркем шығарманы онлайн сауда дүкендері арқылы сатып алуға болады. Мен Қазақстанда ешқашан болған емеспін. Бірақ қуана барар едім. Мәдениеті, тарихы, халқы ерекше қызықтырады. Жуық арада кітаптың электрондық нұсқасын да шығару жоспарда бар» дейді Луис Пул. Бұған қоса ол кітаптың жалғасын жазғысы келеді.

Луистың негізгі мамандығы – суретші. Сондықтан кітаптың иллюстрациясымен өзі айналысқан.

## ШӘМШІ ӘНДЕРІ ШЫРҚАЛДЫ

Музыкалық жас көрермен театры сахналаған «Шәмші» мюзиклінде композитордың 15-ке жуық әні орындалды.

Композитордың өмірі мен шығармашылығына негізделген қойылымда орындалатын Шәмші әндерінің қай-қайсысы да автордың өмірінде орын алған әртүрлі оқиғаны баяндайды. Спектакльдің басты ерекшелігі – әндердің оркестр сүйемелдеуімен жанды дауыста орындалуы. Жүректерге сезім ұялатып, махаббат отын маздатқан мюзиклдің кейінгі жастарға берер тағылымы мен тәрбиелік мәні өте зор. Мәдина Омарова жазған мюзиклді труппа әртістері екі айдан астам уақыт дайындаса, ал спектакльдің режиссері, Қазақстанның еңбек сіңірген қайраткері Асхат Маамиров шығармашыл тұлғаның

бейнесі мен өнер жолын халыққа шынайы жеткізу мақсатында композитордың туған жерін аралап, көп мағлұматқа қанығып қайтқанын тебірене айтты. Театрдың камералық оркестрі сүйемелдеуімен «Жан аға», «Арыс жағасында», «Әнім сен едің», «Қайықта», «Өмір-өзен», «Бақыт құшағында», «Сағыншымы менің», «Қуаныш вальсі», «Ақ маңдайлым», «Сыған әні», «Ақан сері», «Ана туралы жыр», т.б. әндер орындалды.

Диана БАТЫРБЕК,  
Л.Н.Гумилев атындағы  
Еуразия ұлттық университетінің студенті

